

Yeremia, Msemaji kwa Niaba ya Mungu

Ni vema mtu autarajie wokovu wa Bwana na kumngojea kwa utulivu.
Maombolezo 3:26.

Miongoni mwa wale waliokuwa na tumaini la uamsho wa kiroho wa kudumu kama matokeo ya matengenezo chini ya Yosia alikuwa ni Yeremia, aliyeitwa na Mungu kwenye kazi ya unabii akiwa bado ni kijana mdogo...

Ndani ya kijana Yeremia, Mungu alimwona mtu ambaye angekuwa mwaminifu kwa dhamana yake na ambaye angesimama kuitetea haki dhidi ya upinzani mkubwa. "Usiseme, mimi ni mtoto," Bwana alimwambia mjumbe wake mteule; "maana utakwenda kwa kila mtu nitakayekutuma kwake nawe utasema kila neno nitakalokuamuru. Usiogope kwa sababu ya hao, maana mimi nipo pamoja nawe nikuokoe." ...

Kwa miaka arubaini Yeremia alipaswa kusimama mbele ya taifa kama shahidi wa ukweli na haki. Katika wakati wa ukengeufu usio na kifani alipaswa kuonesha mfano wa maisha na tabia ya ibada ya Mungu wa pekee wa kweli. Wakati ule wa kuzingirwa kwa kuogofya kwa Yerusalemu alipaswa kuwa msemaji wa Yehova.

Kwa kawaida, akiwa ni mtu mwenye tabia ya woga na mwenye kuona haya, Yeremia alitamani sana amani na utulivu wa maisha ya kujitenga, ambapo asingelazimika kushuhudia kuendelea kwa moyo mgumu wa taifa lake lililolipenda. Moyo wake ulibinywa na uchungu mkali juu ya uharibifu uliotendwa na dhambi....

Mambo ya maisha ambayo Yeremia aliyapitia katika siku za ujana wake na pia katika miaka ya baadaye ya huduma yake, yalimfundisha somo kwamba "njia ya mwanadamu haimo katika nafsi yake; kuelekeza hatua zake si katika uwezo wa mwanadamu." Alijifunza kuomba, "Ee Bwana, unirudi kwa haki; si kwa hasira yako, usije ukaniangamiza" (Yeremia 10:23, 24).

Alipoitwa kukinywea kikombe cha dhiki na huzuni na alipojaribiwa katika taabu yake kusema, "Nguvu zangu zimepotea na tumaini langu kwa Bwana," alikumbuka majaliwa ya Mungu kwa niaba yake naye akasema kwa shangwe, "Ni huruma za Bwana kwamba hatuangamii, kwa kuwa rehema zake hazikomi.... Bwana ndiye fungu langu, husema nafsi yangu; Kwa hiyo nitamtumaini yeye."